



Akcija SIPA Na području Bihaća uhapšen robovlasnik Abdija Osmanović

Žrtvu silovao i tjerao da prosi

BIHAĆ - Abdiju Osmanovića (47) juče su na području Bihaća uhapsili pripadnici SIPA zbog sumnje da je godinama seksualno zlostavljao i tjerao na prosjačene jednu žensku osobu, čije ime nije saopšteno.

Kako saznaje Press, riječ je o državljanki BiH, ali nije poznato gdje ju je i od koga Osmanović "kupio". Izvor Pressa iz policije rekao je da je nesrećna žena najvjerovatnije "kupljena" na prostoru BiH i da je godinama bila žrtva zlostavljanja.

Osmanović ju je vodio iz grada u grad širom BiH, gdje je morala da prosjači za njega. Po dolasku u neko mjesto on bi iznajmio stan za njih dvoje i bukvalno se nije odvajao od nje. U posljednje vrijeme bili su smješteni na području Unsko-sanskog kantona, gdje je nesrećna žena prosila, a ako ne bi zaradi-

la dovoljno novca, on bi je na razne načine zlostavljao, uključujući i silovanje - rekao je naš sagovornik.

Kristina Jozić, portparolka SIPA, ne želeći da potvrdi ime uhapšenog, rekla je da je istraga u ovom predmetu trajala duže vrijeme i da su tokom nje prikupljeni dokazi koji potvrđuju da je osumnjičeni duže od dvije godine primoravao svoju žrtvu da svakodnevno prosjači i

sav "zarađeni" novac daje njemu.

On je žrtvu prethodno kupio, a zatim držao u ropškom odnosu u periodu dužem od dvije godine. Upotrebom sile i drugim oblicima prinude primoravao ju je da svakodnevno prosjači i da mu donosi novac koji pribavi na taj način, izlažući je pri tome svakodnevnom fizičkom, psihičkom i seksualnom nasilju, čime je počinio krivično djelo trgovina ljudima u svrhu radne eksploatacije - rekla je

Jozićeva, ne želeći da otkrije identitet žrtve. Objasnila je da je riječ o punoljetnoj osobi sa blagom mentalnom retardacijom, koja je svakodnevno postupanju i raznim torturama i da je svaka njena neposlušnost kažnjavana na najsuroviji način. Jozićeva je istakla da je SIPA radeći na ovom slučaju u prethodnom periodu Tužilaštvu BiH podnijela izvještaj protiv nekoliko lica, ali da niko od njih nije hapšen.

Nakon podnošenja tog izvještaja SIPA je nastavila rad na tom predmetu, što je rezultiralo jučerašnjim hapšenjem A.O. Njegova žrtva je u međuvremenu smještena na sigurnu lokaciju i adekvatno zbrinuta. Osumnjičeni će biti priveden u službene prostorije SIPA, gdje će se nad njim biti izvršena kriminalistička obrada, nakon čega će biti predat Tužilaštvu BiH na dalje postupanje - rekla je Jozićeva. **Sn. K.**

NESREĆNU ŽENU SUROVO KAŽNJAVAO
Privođenje osumnjičenog Osmanovića

